



UNIVERSITÄTS-
BIBLIOTHEK
PADERBORN

**Tertia Seraphica Vinea, Sive Tertius Ordo De Poenitentia
à S.P.N. Francisco institutus**

Pauck, Engelbert

Coloniae, 1720

Præfatio Ad benevolum Lectorem & Clientem B. M. V.

[urn:nbn:de:hbz:466:1-64103](https://nbn-resolving.org/urn:nbn:de:hbz:466:1-64103)

ORDO PACIS:

SEU

Confraternitas X. Bene-Placitorum

BEATISSIMÆ VIRGINIS

MARIÆ

Sub Titulo

VIA CRUCIS

Cum Decretis Pontificum in favorem FF. Minorum
& Monialium Annuntiarum novissimè editis

ET

CUM CORONIS

Domini nostri, & Dominae nostræ.

PRÆFATIO

Ad benevolum Lectorem & Clientem B. M. V.

INstitutum Annuntiarum Sororum, Monialium in Belgio (potissimum in Brabantia, Flandria, Gallia, & Hispania vigens) originem suam primario trahit à Serenissima Regina *Joanna Valesia*: quam ex gravissimis causis *Alexander VI.* à Lege, & thoro Mariti sui *Ludovici XII.* Galliarum Regis absolutam declaravit. Unde desideratam nacta est opportunitatem, novum quendam Mariani Cultus erigendi Ordinem, prout jam sexto ætatis suæ anno, ab apparente sibi Virginea Matre, revelatum acceperat. Igitur repente Regiæ Aulæ valedicit blandi-

tiis, Bituricam properat, & P. Nicolai Gilberti Guardiani Ambasiæ (postea *Gabrielis ab Ave Maria* dicti) Viri in rebus spiritualibus versatissimi, ad moderandam conscientiam, consiliis, operâ, & directione utitur; qui proinde Serenissimæ suæ à Confessionibus Filia ad sancti Propositi sui professionem, novi Ordinis institutionem, primique Monasterii erectionem, omnem possibilem industriam contulit & manum, uti & postmodum pro Regia hac Fundatrice, ejusque sequacibus discretam conscripsit Regulam, ad honorem *B. M. V. Annuntiatæ*, & spe-

& specialium ejus virtutum, videlicet: *Castitatis, Obedientiae, Prudentiae, Humilitatis, Fidelitatis, Devotionis, Paupertatis, Misericordiae, Patientiae, & Compassionis.* Quam Regulam ab *Alexandro VI.* 12. Februa. 1501. confirmatam ipsa Domina Joanna publicè & solemniter professa est, & usque ad finem vitæ 4. Februa. 1504. sanctè terminatæ, exactè servavit. Sub interim alius quidam Ordo Monialium Annuntiarum prodiit; quem verò *Leo X.* cum prioribus Annuntiatas conjunctum anno 1515. 9. Junii per Bullam: *Dum præcelsa Meritorum.* &c. PP. Observantibus more Clarissarum gubernandum commisit, purè imitando *Julium II.* Prædecessorem suum: qui 15. Junii. 1511. per Bullam: *Cum vos sub Regula.* Annuntiatas Valesianas gubernio Observantium consignavit. Et *Paulus III. P.* Joanni Huberto Commissario Generali, Viro admodum Religioso, 9. Maji. 1548. Mandatum dedit, alias constitutiones, temporis exigentiæ magis accommodatas condendi. Successores etiam Pontifices: *Paulus V. Gregorius XV. Urbanus VIII.* hunc Annuntiarum Ordinem innumeris gratiis, juri- bus, indulgentiis, ac privilegiis locupletaverunt. Sunt autem hujus Confraternitatis tres Ordines, ut ait *Papa Leo X.* in Brevi directo ad Generalem FF. Min. totius Ord. S. Franc. incipiente: *Cum in honorem.* dato Romæ 6. Julii. 1511. Pontificatus anno 5.

Primus Ordo continet X. Evangelicas Virtutes B. M. V. Hinc ordinatum est; ut Ordinibus hujus Fratres debeant semel de die dicere X. Ave Maria, ad Laudem B. M. Virginis & honorem X. Virtutum ejus, præmittendo unum Pater &c. pro Papa, & felici Ecclesiæ Statu, quibus C. dierum Indulgentiæ sunt annexæ à *Leone X.* toties, quoties dixerint, ultra prius concessas. Item quodcumque audiunt Horas diei, & noctis, dicant semel

Ave Maria ad Laudem B. M. V. ut intercedat apud Filium pro pace Ecclesiæ Catholice. Deinde FF. & Sorores portare debent hujus Confraternitatis & Ordinis X. Insignia [*X. Ave Maria.*] in memoriam X. Virtutum ejusdem Virginis Mariæ.

Secundus Ordo est: uti è variis devotis Personis constat, nil gratius esse B. M. Virgini, quàm cogitare de 5. plagis Filii sui. Ideo ordinatum est, ut FF. & Sorores quotidie dicant 5. Pater, & Ave. &c. in honorem 5. Plagarum Christi, & 5. Dolorum præcipuorum B. V. Mariæ, pro qua devotione similiter obtinebunt Indulgentiam C. dierum. Item ordinatum est: ut FF. & Sorores studeant pacem componere in ædibus, in quibus habitant; & inter eos, cum quibus conversantur, & degunt.


Tertius Ordo specialiter versatur circa reverentiam promovendam, & exhibendam Ss. Altaris Sacramento, Proinde statutum est: ut FF. & Sorores audiant Sacrum diebus singulis, si facultas adsit; ut intersint Processionibus Ss. Sacramenti, illudque cum omni reverentia comitentur, si ad infirmum deferatur. Dum audiunt campanam pro Missa celebranda, dicant semel *Ave Maria* pro Sacerdote celebrante, & populo Sacrum audiente. Pro quibus aliisque piis operibus, dictæ Confraternitatis Fratribus & Sororibus concessus est ingens cumulus Indulgentiarum; quæ adhuc novissimè sunt renovatæ à Ven. Servo Dei *Innocentio XI.* Pro cujus Beatificatione lis Romæ jam pendens felicem progressum habet. Et ab *Innocentio XII.* quorum Brevibus subscriptis *J. P. Card. Albanus* pro tunc Secretarius Brevium, nunc Ecclesiam Dei feliciter regens; ita, ut superfluum sit harum Indulgentiarum renovationem procurare.

Quare devote Lector, & Cliens MARIE, Nomen JESU & MARIE invoca, Christum,

E e & Ma-

& Mariam his Coronis corona, & honora
quotidie; ut in recompensationem Coronæ
tam pretiosæ, in mortis articulo, à coronato
Rege gloriæ, REGE NAZARENO, & à coro-

natâ Cæli, & Mundi Domina audire merearis.
*Vos estis gaudium meum, & Corona mea;
venite. & possidete regnum, quod vobis para-
tum est ab origine mundi.*



ERECTIO CONFRATERNITATIS
decem Bene-Placitorum

SEU

Decem Virtutum B. Virginis

MARIÆ

Sub Titulo

VIÆ CRUCIS

Vel

VIÆ SAGRÆ

usque ad montem Calvariæ,

Et sanctissimum D. N. J. C. Sepulchrum

Protensæ.

In quâ eadem Beatissima Virgo Maria decimum ex prædictis Beneplacitis post mortem Filii sui compassivis affectibus sæpissime complevit & se imitandam in perpetuum Fidelibus magistraliter exhibuit.

F. Bonaventura de Majori, Guardianus S. Montis Sion, & totius Terra Sanctæ Custos, ac Commissarius Apostolicus. &c. in Domino plurimum dilectis RR. Adm. PP. Commissariis Generalibus Terra Sanctæ, apud Aulas præcipuas Nationum [in quas Ordo noster in Christianitate primò dividitur] commorantibus: Salutem in Eo, qui est vera salus.

II. **A**lma Mater (Ecclesia) Sanctorum fulgens exemplis, nihil solertiùs Filiis suis suadet: quàm sanctæ Dei Genitricis imitationem, & Eucharistici Sacramenti eximiam